

TARIKH : 23 DISEMBER 2022
AKHBAR : BERITA HARIAN
MUKA SURAT : 31

PETRONAS catat 10 penemuan hidrokarbon

PETRONAS catat 10 penemuan hidrokarbon

Pertambahan pangkalan sumber minyak, gas negara hasil peningkatan aktiviti cari gali

Oleh Mohd Zaky Zainuddin
zaky@bh.com.my

PETRONAS dan kontraktor penyusunan petroleum (PAC) merekodkan 10 penemuan hidrokarbon di Malaysia tahun ini, berikutan peningkatan aktiviti cari gali di Malaysia.

Syarikat minyak dan gas nasional itu dalam satu kenyataan berkata, lapan daripada 10 penemuan minyak dan gas didapati di luar pantai Sarawak dan satu, masing-masing di luar pantai Sabah serta Semenanjung.

"Penemuan minyak terbesar

dibuat oleh Petronas Carigali di telaga Nahara-1 di Blok SK306 dalam wilayah Balingian Sarawak.

"Penemuan juga dibuat di wilayah Luconia Tengah, Luconia Barat dan Baram Sarawak, yang menjadi antara lembangan paling prolifrik di Malaysia dan menempatkan banyak medan gas di negara ini," katanya.

Menurut PETRONAS, di Central Luconia Shell turut menemukan gas di telaga Hina-1 dan Temu-1 di Blok MLNG, manakala Mubadala Energy menemui lebih banyak gas di Blok SK320 di telaga Cengkih-1.

"Di wilayah Luconia Barat pula, ConocoPhillips menggerudi tiga telaga penerokaan di Blok WLA-00 dan menemui gas di telaga Gagau-1, manakala telaga Salam-3 dan Benum-2 mengesahkan lanjutan pengumpulan minyak dan gas di blok besar bersebelahan.

"Di wilayah Baram yang sudah matang, PTTEP membuat satu lagi penemuan gas di Blok SK410B

menerusi telaga Paprika-1, di mana Lang Lebah gergasi itu juga ditemui pada 2019," katanya.

PETRONAS turut mengesahkan, TotalEnergies membuat penemuan minyak dan gas di telaga Tepat-2 di Blok N dalam wilayah Sabah Trough yang sedang berkembang di perairan ultra dalam Sabah, seterusnya bukti lebih luas selepas penemuan minyak dan gas terdahulu di Tepat-1 pada 2018.

"Di luar pantai semenanjung, Hess menemui takungan gas baharu di telaga Bergading Deep-4 di Blok PM302 dalam Lembangan Melayu Utara," katanya.

Aktiviti penerokaan meningkat

Mengulas mengenainya, Naib Presiden Kanan Pengurusan Petroleum Malaysia (MPM) PETRONAS, Mohamed Firouz Asnan, berkata 2022 menjadi tahun baik untuk aktiviti penerokaan di negara ini.

"Saya sangat gembira dengan peningkatan aktiviti penerokaan,

di mana 16 telaga sudah siap, dengan dua lagi sedang diusahakan sekali gus menggandakan angka yang dicapai tahun lalu.

"Nisbah kejayaan 60 peratus kami mengesahkan sifat prolifrik lembangan Malaysia. Kebanyakan penemuan boleh dimanfaatkan dengan cepat pada kos yang lebih rendah, memandangkan ia berdekatan dengan rangkaian luas infrastruktur sedia ada," katanya.

Sementara itu, Pengurus Besar Kanan Penerokaan Sumber MPM Petronas, Azmir Zamri berkata, set data berbilang pelanggan MPM yang luas meliputi kawasan baru muncul dan sempadan akan terus menjadi kunci dalam mempercepatkan masa untuk penggerudian.

"Diperkukuhkan dengan pelan penjujukan pelantar jangka panjang MPM, PAC kami bersedia untuk menggerudi sebanyak 30 telaga penerokaan tahun depan. Ini adalah sebahagian daripada usaha untuk terus me-

Ini adalah sebahagian usaha untuk terus meningkatkan pangkalan sumber hidrokarbon negara bagi memenuhi permintaan tenaga semakin meningkat

Mohamed Firouz Asnan, Naib Presiden Kanan MPM PETRONAS



ningkatkan pangkalan sumber hidrokarbon negara bagi memenuhi permintaan tenaga yang semakin meningkat, bukan hanya domestik, malah global," katanya.

Selain kejayaan penerokaan, terdapat juga peningkatan pengambilan dalam Pusingan Bidaan Malaysia (MBR) 2022, di mana pelabur menyahut saranan untuk pelaburan penerokaan yang lebih besar.

PETRONAS berkata, pemeteraian kontrak perkongsian pengeluaran untuk bidaan MBR 2022 yang berjaya dijadualkan pada Februari tahun depan, diikuti pelancaran MBR 2023.